



Robert Casanova sa retira en in onn sco president da l'Uniu chantunala da musica dal Grischun.



S'engaschan tuts trais fitg per l'uniu che unescha musicantas e musicants da noss chantun. (da san.) Ivan Vinzens, Not Janett e Daniela Vincenz.



Quai vala er per ils trais Engiadinais (da san.) Reto Mayer, Robert Koch e Jachen Kienz.



Roman Caprez, che banduna la cumissiun da musica cun Luana Menoud-Baldi, commembra da la direcziun da l'Uniu svizra da musica.



Dus musicants ed ina musicanta da Surmeir (da san.) Sergio Mark, Maria Thöni e Josef Schaniel.



En las localitads da quel object istoric ha gi lieu la radunanza.

FOTOS G. N. STGIER

Musicantas e musicants èn ids ad aut

Uniu chantunala da musica dal Grischun

DA GION NUTEGN STGIER / ANR

■ **En in onn sa retira il president Robert Casanova. Quai ha el ditg a la fin da la radunanza da delegads da l'uniu a Tavau. La cumissiun da musica ha dus novs commembers. La proxima Festa da musica chantunala da giuvenils ha lieu il zercladur 2016 a Lai.** Organisa la radunanza da delegads da l'Uniu chantunala da musica dal Grischun ha la Societad da musica Tavau ses lur president *Claudio Cajacob*. Sut la direcziun da *Jürg Wasescha* han lura ils 28 musicants e musicantas er gist purschi il bainvegni musical als 100 delegads ed als numerus giasts. Particular è bain stà il lieu da la radunanza, cun avair lieu quella a la «Schatzalp» èn las localitads da l'hotel da stil floreal, che datescha dal 1900 ed è situà sin 1920 m surmar. Beneventada è la gronda raspada betg mo vegnida da Claudio Cajacob, mabain er da *Herbert Mani*, commember dal cussegl pitschen da la vischnanca da Tavau. L'um, uriund dad Andeer, ha cunzunt engrazià a las musicantas ed als musicants per lur lavur voluntaria en favur da la cultura e da la publicitad.

Vinavant tgirar la cultura da vischnanca

Drizzà intgins plets a las delegadas ed als delegads ha er cusseglier guvernativ *Martin Jäger*. El ha ditg ch'il chantun duai er en il futur sustegnair las unius culturals pli pitschnas e betg mo quels che pretendan entras las gasettas dapli sustegn. Er sche da preschent fusiuneschan numerus vischnancas en noss chantun, duajan las unius dal lieu sco musicas vi-

navant restar autonomas ed er en l'avengnir tgirar la cultura da vischnanca, ha ditg il schef dal departament da cultura ed educaziun. Ultra da quai ha el ditg che a la politica fashess magari bain dapli armonia sco quai ch'i saja il cas tar musicantas e musicants. *Luana Menoud-Baldi*, la delegada da l'Associaziun svizra da musicantas e musicants ha ditg ch'ils plets uneschian, movian e fascineschian, che *Robert Casanova* haja duvrà èn ses pled da bainvegni per la musica, sajan schizunt l'impuls per far gugent musica.

Alexa Deplazes e Gian Stecher da nov en la cumissiun da musica

President da l'Uniu chantunala da musica dal Grischun è dapi diesch onns Robert Casanova da Vignon. En in onn a Scuol vegnia el a manar sia davosa radunanza da delegads, ha ditg il Lumnezian. El deplorescha che l'uniu ha gi il davos 12 mais tar il dumber dals commembers in regress da 5%. In fatg plaschaivel saja dentant che dals stgars 3000 commembers sajan 39% dunnas. Senza quellas fess strusch pussaivel da tgirar la cultura da musica en noss chantun, ha menziunà Robert Casanova. Il president ha lura er engrazià a las 83 vischnancas che han sustegnì l'onn passà las furmaziuns da musica cun 305 000 francs.

Da nov en suprastanza da l'Uniu chantunala da musica dal Grischun è vegnida elegida *Isabella Badrutt* da Tavau. Ella vegn a sustegnair la cassiera *Daniela Vincenz* cun lavurs administrativas cun betg esser stà pussaivel da chattar ina persuna che surpiglia il secretariat da l'uniu. Vacant è da preschent er anc il

post da marketing, cun avair inoltrà *Roman Sommer* da Bravuogn sia demission. Da nov a la cumissiun da musica appartegnan *Alexa Deplazes* e *Gian Stecher*, omadus da Cuira. La dunna e l'um remplazzan *Roman Caprez* da Root e *Hanspeter Bircher* da Cuira, ch'èn sa retratgs da quel uffizi. Il quint annual da l'Uniu chantunala da musica dal Grischun sera cun antradas da stgar 161 000 francs cun in gudogn da 5342 francs.

72 novs veterans

L'onn passà han las societads da musica da noss chantun piglià per adina cumià da 29 musicants e musicantas. Cun in mument da silenzi èn ils preschents sa regurdads a lur collegas. Er quest onn vegnan undrads ina rotscha musicants e bleras musicantas per lur fidaivladad tar ina societad da musica. Total èn quai 72 musicantas e musicants. 44 èn lura da nov veterans chantunals, 21 vegnan da nov veterans federals, trais veterans d'onur e quatter retschaivan la medaglia sco veterans CISM per ina commembranza da 60 onns tar ina furmaziun da musica. Undrads vegnan musicants e musicantas a Zezras ed a Trun a chaschun dad occurrenz da musica. L'onn che vegn han lieu a Ftan ed a Sursaiassa festas districtualas da musica e previs era da manar tras en in da quels lieus, la sonda, la 6avla Festa da musica chantunala da giuvenils. Ord divers motivs saja quai dentant betg pussaivel, ha ditg Robert Casanova. «Nus essan dentant fitg ventiraivels che la Societad da musica Vaz/Lai surpiglia quella organizaziun il zercladur 2016 a chaschun da la Festa da musica districtual», ha ditg il Lumnezian.



Sunà ha la Societad da musica Tavau sut la direcziun da Jürg Wasescha da Savognin.